

CONVENIO DE COLABORACIÓN ENTRE A CONSELLERÍA DE SANIDADE E A UNIVERSIDADE DE SANTIAGO DE COMPOSTELA PARA A CREACIÓN DA CÁTEDRA INSTITUCIONAL “VIDA SAUDABLE”.

MEMORIA XUSTIFICATIVA

O secretario xeral técnico da Consellería de Sanidade, **DECLARA:**

Que a Consellería de Sanidade asinou coa Universidade de Santiago de Compostela (USC) o 28.03.2023 o convenio arriba referido. O convenio terá unha vixencia de catro anos desde o día seguinte ao da súa sinatura podendo ser prorrogado por acordo expreso das partes, por un período máximo de catro anos, respectando os límites previstos no artigo 49.h) da Lei 40/2015, do 1 de outubro, de réxime xurídico do sector público.

Que o instrumento convencional asinado ten por obxecto a formalización da creación da cátedra Institucional “*Vida Saudable*”, de acordo co Regulamento de Creación e Réxime de Funcionamento das Cátedras Institucionais da Universidade de Santiago de Compostela aprobado o 7 de febreiro de 2020. A cátedra creada a través do convenio asinado, enténdese como foro para a execución de actividades docentes, académicas e investigadoras afectas a un campo do coñecemento como é a especialización en hábitos de vida saudable e envellecemento activo.

Que existe converxencia de intereses entre as entidades asinantes en orden á consecución do obxecto referido.

Que o convenio asinado fundaméntase no seguinte:

Á Dirección Xeral de Saúde Pública, a través da Subdirección Xeral de Programas de Fomento de Estilos de Vida Saudables, correspóndelle a aplicación e a execución das directrices de fomento de estilos de vida saudables e a coordinación das actividades de promoción e educación para a saúde.

Así, desde o Servizo de Estilos de Vida Saudables e Educación para a Saúde terase que planificar, programar e xestionar as actividades dos programas de promoción de estilos de vida saudables e a difusión da información sobre os mencionados programas; así como planificar, programar e xestionar as actividades de prevención e control das enfermidades non transmisibles e a difusión da información sobre elas e todas aquelas accións que, dentro do seu ámbito, lle sexan asignadas.

Polo tanto, a Dirección Xeral de Saúde Pública ten entre os seus obxectivos a prevención, promoción e protección colectiva da saúde da poboación galega e o desenvolvemento de programas en materia de saúde pública. Dentro deste ámbito considerouse fundamental o desenvolvemento de novas liñas de actuación e de investigación en hábitos de vida saudables e de envellecemento activo; e a creación dunha rede de investigación e innovación galega en promoción da saúde; o establecemento dun sistema de avaliación periódica do sobrepeso e a obesidade da poboación galega e dos cambios no comportamento relacionados cos seus factores protectores e realizar cursos, seminarios, conferencias e cantas actividades redunden na difusión, coñecemento e a práctica dun estilo de vida saudable.

O Consello de Goberno da USC, na sesión ordinaria celebrada o 7 de febreiro de 2020, aprobou o Regulamento de Creación e Réxime de Funcionamento de Cátedras Institucionais da USC e o modelo tipo de convenio de colaboración para a creación de cátedras institucionais. Tal e como se recolle no seu preámbulo: *"De acordo co disposto no artigo 2.2 da Lei Orgánica 6/2001, do 21 de decembro, de Universidades entre as atribucións e competencias propias da autonomía universitaria figuran a creación de estruturas específicas que actúen como soporte da investigación e da docencia, así como o establecemento de relacións con outras entidades para a promoción e o desenvolvemento dos seus fins institucionais. Na mesma idea insiste o artigo 17.6 da Lei 6/2013, do 13 de xuño, do Sistema Universitario de Galicia (SUG), que se refire á posibilidade de cooperación das universidades con organismos públicos de investigación e con empresas, entre outras opcións previstas para un mellor servizo á sociedade.*

No marco da formación, investigación e transferencia de resultados no sistema universitario, o artigo 64 da Lei 2/2011, do 4 de marzo, de economía sustentable, dispón que as Universidades potenciarán as súas funcións de investigación básica e aplicada de transferencia do coñecemento á sociedade, para a mellora do benestar e a competitividade, mediante o desenvolvemento de proxectos e iniciativas de colaboración co sector produtivo.

Esta colaboración poderá levarse a cabo mediante calquera instrumento admitido polo ordenamento xurídico, entre eles a creación de cátedras-empresa (art. 64.2, letra e, Lei 2/2011).

Baixo a denominación xenérica de Cátedras Institucionais, a USC vén desenvolvendo desde hai moito tempo relacións de colaboración con empresas e outras entidades, tanto públicas como privadas, que dentro da súa heteroxeneidade conflúen no propósito común de que as actuacións desenvolvidas redunden non só en beneficio da comunidade universitaria, senón tamén das propias empresas e entidades patrocinadoras das cátedras."

O Regulamento de Creación e Réxime de Funcionamento das Cátedras Institucionais da USC establece, no seu artigo 3, o procedemento de creación das cátedras institucionais e, no seu artigo 4, indica que para a creación das cátedra é necesario un acordo de aprobación do Consello de Goberno da USC e establece tamén o contido mínimo que debe incluír o convenio no que se formaliza a súa creación.



A Consellería de Sanidade e a USC conscientes de que tiñan obxectivos coincidentes e complementarios, consideraron xustificada a formalización dun convenio para a creación dunha cátedra institucional para o fomento da docencia, a investigación e a difusión dos coñecementos no campo da promoción da saúde.

O consello da Xunta de Galicia, na súa reunión do 9 de febreiro de 2023, autorizou a celebración do convenio para a creación da cátedra Institucional "*Vida Saudable*".

Pola súa parte, o Consello de Goberno da USC, na sesión ordinaria que tivo lugar o día 23 de febreiro de 2023, aprobou a proposta de creación da cátedra institucional "*Vida Saudable*".

Para o financiamento do convenio está previsto un crédito de cen mil euros (100.000,00 €), dos cales 25.000,00 € financiaranse con cargo á partida orzamentaria 12.02.413A.640.1 (código de proxecto 201400466) dos orzamentos da Consellería de Sanidade - Dirección Xeral de Saúde Pública para o ano 2023; 25.000,00 con cargo aos ditos orzamentos para o ano 2024; 25.000,00 € con cargo aos do ano 2025 e 25.000,00 € con cargo aos do ano 2026, condicionado, polo que respecta ás tres últimas anualidades, á existencia de crédito axeitado e suficiente nos ditos orzamentos.

Pola súa parte, a USC contribuirá ao mantemento da Cátedra cunha achega en especie cuantificada nunha cantidade equivalente á achega da Consellería de Sanidade, que se materializará coa achega da infraestrutura necesaria para a súa realización, na que incluírá aulas e salas adecuadas, material bibliográfico e bases de datos, espazos web, materiais didácticos e informativos, material informático e audiovisual e outros que se precisen.

Os intereses converxentes das partes asinantes exclúen o ánimo de lucro, e non podían satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do devandito convenio, con exclusión doutras figuras.

E para que conste, asínase esta memoria, en Santiago,

